

Служба собору новомучеников и исповедников Российских

Поется месяца ианнуариа в 15-й день, аще Неделя, или в Неделю,
ближайшую после 15-го дне.

На малей вечерни

На Господи, возвах: стихиры воскресны гласа.

Слава, новомучеников, глас 1:

О, велицыи страстотерпцы,/ новомученицы Российстии,/ с
любовию припадаем к вам/ и, благоговейно лобызающе раны
вашя,/ прославляем ваша подвиги и молимся:/ молитве о душах
наших.

И ныне, Богородичен гласа.

На стиховне стихиры новомучеников, глас 6.

Подобен: Тридневен:

Помяни, Господи, иже о Тебе пострадавшыя,/ новыя
страстотерпцы,/ от родов наших прозябшыя/ и муки
многообразныя претерпевшыя,/ и прими их моления/ о
спасении нашем.

Стих: Мне же зело честни быша/ друзи Твои, Боже.

Даровал еси, Судие праведный,/ исповедником Церкви
Российския/ Царство Небесное/ и блаженство вечное./ Приими
ныне, Господи, моление их/ о спасении душ наших.

Стих: Изочту их/ и паче песка умножатся.

Яко звезды пресветлыя,/ сияют на Небеси новомученицы
Российстии,/ кровь же их святая удобри Землю Русскую/ во
освящение и благословение./ Тех молитвами, Христе Боже,/
помилуй и спаси души наша.

Слава, глас и подобен тойже:

О, Троице Пресвятая,/ род наш от греховнаго пленения избави/ и
на путь правый настави/ предстательством новомученик
Российских,/ иже молят Тя, Триипостасный Боже,/ о спасении
душ наших.

И ныне, Богородичен, глас тойже:

О, Благодатная и Пречистая Дево Марие,/ Ходатаице и
Заступнице всех верных,/ предстательством новомучеников и
исповедников Российских/ расточенныя собери, малодушныя
возстави,/ отпадшыя же от святыя веры обрати/ и в церковное
лоно возврати.

Тропарь воскресен.

Слава, новомучеников, писан на велицей вечерни.

И ныне, Богородичен.

На велицей вечерни,

Блажен муж: 1-й антифон. На Господи, возвах: стихиры
воскресны гласа три и анатолиева 1, и новомучеников, глас 6.

Стихиры новомучеников, глас 5

Подобен: Радуйся:

Радуйтесь, новомученицы и исповедницы Российстии,/
православных удобрение,/ новозакланнии агнцы,/ веры

поборницы и хранителие,/ ходатаи о нас к Богу непостыднии,/ в
лета последняя/ страданьми подражателие первым мучеником
явистеся,/ терпения столпи непоколебимии,/ душам нашим
испросите велию милость.

Радуйтеся, стратотерпцы славнии,/ стопам последующе древних
мученик,/ веры ради подвизаетея твердо/ в лютая времена Земли
нашея,/ и ныне всех подвизаете к славе и хвалению Бога,/
укрепльшаго ваше немощное естество/ и обогатившаго вас
дарованьми Духа,/ во спасение душ наших.

Творение святителя Афанасия Ковровскаго.

Глас и подобен тойже:

Приидите, Небеснии предстателие наши, к нам,/ вашего чающим
милостивнаго посещения,/ и избавите озлобленныя
мучительскими прещении/ лютаго неистовства неверных,/ от
ниже, яко пленницы и нази, гоними есмы,/ от места на место
часто преходяще/ и заблуждающе в вертепех и горах./ Ущедрите
убо, прехвальнии,/ и даруйте нам ослабу,/ утолите бурю/ и угасите
еже на ны негодование,/ Бога моляще,/ подающаго вами Земли
нашей велию милость.

Ины стихиры новомучеников, глас 6.

Подобен: Все отложше:

Святителю отче Тихоне,/ архипастырю многострадальне,/ ты в
годину лютых безбожных гонений/ верная чада Церкви
Российския,/ утешая, призывал еси/ за Христа и веру
Православную мужественне стояти,/ сам же, по вся дни умирая за
паству твою,/ исповедник непоколебимый явился еси./ Сего ради
тя с любовию прославляем.

Пастырю истинный,/ священномучениче Владимире,/ егда
беззаконнии понуждаху тя/ Церкви Российския отступитьи,/ верен
делом и словом/ святителю Тихону пребыл еси/ и, яко священная
жертва, от Киева, матере градов русских,/ Богу принеслся еси,/
моляся о убивающих тя./ Сего ради тя усердно прославляем.

Священномучениче Вениамине,/ Церкви Христовы истинный
сыне/ и благостояния Ея усердный ревнителю,/ противу
лжепастырей, тщащихся расхитити стадо твое,/ мужественне стал
еси/ и, не убоаяся прещений и лжесвидетельств мучителей,/
обратил еси суд на главу судивших тя,/ таже смертью твоею/
Православие утвердил еси./ Сего ради тя усердно ублажаем.

Слава, новомучеников, глас 5:

Всевышний Владыко,/ в Троице славимый и покланяемый,/
ущедри ны благоприятными мольбами/ новых мученик Твоих,/
пред мучители дерзновенно исповедавших Тя,/ Единого
истиннаго Бога,/ и Твое, Сыне Божий,/ неизреченное от Матере
Девы/ спасительное воплощение.

И ныне, Богородичен.

Вход. Прокимен дне. И чтения новомучеников.

Деяний святых апостол чтение (гл.4,6-31):

В тья дни собращася во Иерусалим князи, старцы, книжницы/ и елицы беша от рода архиерейска./ И, поставльше Петра и Иоанна посреде, вопрошаху:/ коею силою или коим именем исцелиста хромага./ Петр, исполнився Духа Свята, рече:/ князи людстии и старцы Израилевы,/ аще мы днесь истязуеми есмы о благодеянии человека немощна,/ о чесом сей спасеся,/ разумно буди всем вам и всем людем Израилевым,/ яко во имя Иисуса Христа Назореа,/ Его же вы распясте,/ Егоже Бог воскреси от мертвых,/ о сем Сей стоит пред вами здрав:/ Сей есть камень, укоренный от вас зиждущих,/ бывый во главу угла,/ и несть ни о едином же ином спасения:/ несть бо иного имене под небесем, даннаго в человецех,/ о немже подобает спастися нам./ Видяще же Петрово дерзновение и Иоанново и разумеюще,/ яко человека некнижна еста и проста, дивляхуся,/ знаху же их, яко со Иисусом беста:/ видяще же изцелевшаго человека с нима стояща,/ ничтоже имяху противу рещи./ Повелевше же има вон из сонмища изыти,/ стязахуся друг со другом, глаголюще:/ что сотворим човекома сима;/ яко убо нарочитое знамение бысть има,/ всем живущым во Иерусалиме яве,/ и не можем отврещися:/ но да не более прострется в людех,/ прещением да запретим има ктому не глаголати о имени сем ни единому от человек./ И призваше их,/ заповедаша има отнюдь не провещавати ниже учити о имени Иисусове./ Петр же и Иоанн отвещавше к ним реста:/ аще праведно есть пред Богом/ вас послушати паче, нежели Бога, судите:/ не можем бо мы, яже видехом и слышахом, не глаголати./ Они же призапрещше има, пустиша я,/ ничтоже обретше како мучити их, людей ради,/ яко вси прославляху Бога о бывшем:/ лет бо бяше множае четьредесяти человек той,/ на немже бысть чудо сие изцеления./ Отпущена же бывша приидоста ко своим и возвестиста,/ елика к нима архиереи и старцы реша./ Они же, слышавше, единодушно воздвигоша глас к Богу и рекоша:/ Владыко, Ты, Боже, сотворивый небо и землю и море и вся, яже в них,/ иже Духом Святым усты отца нашего Давида, отрока Твоего, рекл еси:/ вскую шаташася языцы, и людие поучишася тщетным;/ предсташа царие земстии,/ и князи собращася вкупе на Господа и на Христа Его./ Собращася бо воистинну во граде сем на святаго отрока Твоего Иисуса,/ Егоже помазал еси,/ Ирод же и Понтийский Пилат с языки и людьми израиловыми,/ сотворити, елика рука Твоя и совет Твой преднарече быти:/ и ныне, Господи, призри на прещения их/ и даждь рабом Твоим со всяким дерзновением глаголати слово Твое,/ внегда руку Твою прострети Ти во исцеления,/ и знамением и чудесем бывати Именем святым отрока Твоего Иисуса./ И помолившимся им, подвижесе место, идеже бяху собрани,/ и исполнишася вси Духа Свята/ и глаголаху слово Божие со дерзновением.

К Тимофею послания святаго апостола Павла чтение (2 Тим. 4,1-8):

Чадо Тимофее,/ засвидетельствую убо аз пред Богом и Господем
нашим Иисус Христом,/ хотящим судити живым и мертвым в
явлении Его и царствии Его:/ Проповедуй слово,/ настой
благовременне и безвременне,/ обличи, запрети, умоли со всяким
долготерпением и учением./ Будет бо время, егда здраваго учения
не послушают,/ но по своих похотех изберут себе учителя, чешими
слухом,/ и от истины слух отвратят, и к баснем уклонятся./ Ты же
трезвися о всем, злопостражди,/ дело сотвори благовестника,/
служение твое известно сотвори./ Аз бо уже жрен бываю,/ и время
моего отшествия наста./ Подвигом добрым подвизахся,/ течение
скончах, веру соблюдох./ Прочее убо соблюдается мне венец
правды,/ егоже воздаст ми Господь в день он, праведный Судия,/
не токмо же мне, но и всем возлюбившым явление Его.

Ко Евреем послания святаго апостола Павла чтение (11, 33-40):
Братие,/ иже верою победиша царствия,/ содеяша правду,
получиша обетования,/ заградиша уста львов,/ угасиша силу
огненную,/ избегоша острей меча,/ возмогоша от немощи,/ быша
крепцы во бранех,/ обратиша в бегство полки чуждых./ Прияша
жены от воскресения мертвых своих./ Инии же избиени быша, не
приемше избавления,/ да лучшее воскресение улучат./ Друзии же
руганием и ранами искушение прияша,/ еще же и уз и темниц./
Камением побиени быша,/ претрени быша, искушени быша,/
убийством меча умроша,/ проидоша в милотех, и в козиях кожах,
лишени, скорбяще, озлоблени./ Ихже не бе достоин весь мир,/ в
пустынях скитающиеся и в горах, и в вертепах, и в пропастьех
земных./ И сии вси, послушествовани бывше верою, не прияша
обетования./ Богу лучшее что о нас предзревшу,/ да не без нас
совершенство примут.

На литии стихира храма и новомучеников, глас 6.

Творение святителя Афанасиа Ковровскаго.

Подобен: Отчаянная:

Отчаянни есмы/ жития ради/ и не имамы нрава добродетельна,/
яко миро, приносим Ти, Господи,/ молитвы святых сродников
наших./ Не отвержи Русь издревле Святую,/ ныне же грехов
наших ради люте страждующую./ Не презри слезы верных
сынов,/ колен своих пред Ваалом не преклонявших,/ и ихже не
поразил еси, согрешающих./ Приими нас, кающихся, Боже,/
святых Твоих мольбами.

Слава, глас 8:

Приидите, мучениколюбцы,/ приидите, составим лик,/
торжествующе и Бога прославляюще/ в радостный праздник
новомучеников и исповедников Российских,/ сии бо не
уклонишася скорби,/ ни убояшася темницы,/ горькими работами,
гладом и хладом изморени/ и многовидными муками
умерщвляеми,/ яко агнцы незлобивии, смерть прияша./ И ныне в
радости святых/ молят Триединого Бога о земнем отечестве своем.
И ныне, глас тойже:

Владычице, прими молитвы раб Твоих/ и избави нас/ от всякия нужды и печали.

На стиховне стихиры воскресны гласа. Слава, новомучеников, глас 2: Новый доме: И ныне, Богородичен, глас 8: О, преславнаго чудесе:

Стихиры новомучеников, глас 2.

Творение святителя Афанасия Ковровскаго.\

Подобен: ДOME Евфрафов:

Земле Русская,/ граде святыи,/ украшай твой дом,/ в немже Божественный/ велии сонм святых прослави.

Стих: Господи, Господь наш,/ яко чудно Имя Твое по всей земли.

Церковь Русская,/ красуйся и ликуй,/ се бо чада твоя/ Престолу Владычню/ во славе предстоят, радующеся.

Стих: Святым, иже суть на земли Его,/ удиви Господь вся хотения Своя в них.

Соборе святых русских,/ полче Божественный,/ молитесь ко Господу/ о земном отечестве вашем/ и о почитающих вас любовью.

Слава, глас и подобен тойже:

Новый доме Евфрафов, / уделе избранный, / Русь Святая, / храни веру Православную, / в нейже тебе утверждение.

И ныне, Богородичен, глас 8.

Подобен: О, преславнаго чудесе:

О, преславнаго чудесе!/ Небесе и земли Царица,/ от святых сродников наших умоляемая,/ до ныне землю Русскую покрывает/ и лика Своего изображении милостивно обогащает./ О, Владычице Державная!/ Не престани и на будущее время/ во утверждение на Руси Православия/ милости и чудеса изливати до века. Аминь.

На благословении хлебов, Богородице Дево: дважды, и тропарь новомучеников, глас 4, единожды.

Тропарь новомучеников, глас 4:

Днесь радостно ликует Церковь Русская,/ прославляющи новомученики и исповедники своя:/ святители и иереи,/ царственныя страстотерпцы,/ благоверныя князи и княгини,/ преподобныя мужы и жены/ и вся православныя христианы,/ во дни гонения безбожнаго/ жизнь свою за веру во Христа положившыя/ и кровью Истину соблюдыя./ Тех предстательством, Долготерпеливе Господи,/ страну нашу в Православии сохрани/ до скончания века.

На утрени

На Бог Господь: тропарь воскресен (дважды). Слава, новомучеников. И ныне, Богородичен.

По 1-м и 2-м стихословии седальны воскресны с Богородичны их.

По полиелеи два седальна новомучеников, глас 4 (писаны по 1-м и 2-м стихословии). Слава, полиелейный седален новомучеников, глас 6. И ныне, Богородичен, глас 8

По 1-м стихословии седален, глас 4:

Новомученицы Российстии,/ кровию своею веру запечатлевшии,/ Владыку всех молити/ Церковь Русскую в Православии утвердити,/ Землю нашу от скверн очистити,/ люди во благочестии сохранить/ во общее всех спасение.

Слава, и ныне, Богородичен, глас тойже:

В кров Твой, Пречистая Дево, прибегающих, мольбу приемлещи от нас,/ не престай молящи Человеколюбца, спасти рабы Твоя.

По 2-м стихословии седален, глас 4:

Иже в земли Российстей новомученик и исповедник Твоих,/ яко багряницею и виссом, кровьми Церковь Русская, украсившия, Христе Боже, теми вопиет Ти:/ людям щедроты твоя низпосли,/ мир жительству Твоему даруй/ и душам нашим велию милость.

Слава, и ныне, Богородичен, глас тойже:

Иже благодарно воспевающийи от сердца/ и просящии прилежно Твоя милости, Богородице Владычице, раби Твои зовут и глаголют:/ Пресвятая Дево, предвари и избави от враг видимых и невидимых, и всякаго прещения:/ Ты бо еси наше заступление.

Величание:

Величаем вас,/ святии новомученицы и исповедницы Российстии,/ и чтим честная страдания ваша,/ яже за Христа/ претерпели есте.

Псалом избранный: Бог нам Прибежище и Сила:

Аще храм святым, по полиелеи седален, глас 6:

Творение святителя Афанасия Ковровскаго.

Мужайся, Христова Церковь,/ и державствуй над всею борющимися!/ Христови бо друзи о тебе пекутся/ и, предстояще и обстояще,/ ихже общий праздник/ ныне совершаеши светло.

Слава, и ныне, Богородичен, глас 8:

Яко Деву и едину в женах, Тя без семени рождшую Бога плотию,/ вси ублажаем, роди человечестии:/ Огнь бо вселися в Тя Божества,/ и яко Младенца доиши Зиждителя и Господа./ Тем, ангельский и человеческий род, достойно славим пресвятное Рождество Твое и согласно вопием Ти:/ моли Христа Бога, согрешений оставление даровати,/ поклоняющимся верою пресвятому Рождеству Твоему.

Аще храм новомучеников, Прокимен, глас 4: Проидохом сквозе огонь и воду,/ и извел еси ны в покой. Стих: Разжегл ны еси, якоже разжизается сребро. Евангелие Матфеа, зачало 36 (10, 16-22).

По 50-м псалме стихира, глас 6:

Церкве Русския столпи непоколебимии,/ соборе новомучеников и исповедников Российских,/ сердцем верующе в правду,/ усты Господа Иисуса Христа исповедали есте во спасение,/ и заточения, изгнания, горькия работы и смерть/ Бога ради сладце претерпели есте./ Темже тепле молитесь ко Господу,/ Русь Святую в Православии утвердити/ и спасти души наша.

Канон воскресен со ирмосом на 4, Богородицы на 2, и новомучеников на 8.

Канон новомучеников, глас 6.

Песнь 1

Ирмос: Сеченое сечется/ море Чермное,/ волнопитаемая же
изсушается глубина,/ таяжде купно безоружным бывши
проходима и всеоружным гроб./ Песнь же богокрасная
воспевашеся:/ славно прославися Христос Бог наш.

Припев: Святии новомученицы и исповедницы Российстии,/ молитесь Бога о нас.

Господи, Боже наш, присно прославляяй вся святыя,/ ныне и нас,
недостойных, сподоби сыновне прославить святых сродников
наших,/ новомучеников и исповедников Российских.

Кровьми вашими священномученицы, яко в Чермном мори,
потопили есте безбожныя мучители,/ Церковь же Русская, вами
красящися,/ похвалы победныя , яко земля обетованная мед и
млеко, вам источает.

Егда дадеся вам благодать, не точию во Христа веровати,/ но и по
Нем страдати,/ немокренно пучину кровных мук проидосте,
святии мученицы,/ верным сыновом российским образ явьше,/ и
со дерзновенным исповеданием во врата Небесная внидосте.

Богородичен: Приими песнь хвалебную от недостойных уст
возносимую,/ препрославленная Мати Божия.

Песнь 3

Ирмос: Господь Сый всех и Зиждитель Бог,/ созданное,
безстрастный обнищав, Себе соедини,/ и Пасха, за яже хотяше
умрети,/ Сам Сый Себе предпожре:/ ядите, вопия, Тело Мое,/ и
верою утвердитесь.

Егда буря нечестия на Церковь Русскую воздвижесе,/ вы, святии
новомученицы, страданьми вашими со тщанием укротисте ю/ и
подвиги вашими Православие утвердисте.

Муки велия за Церковь Христову претерпесте, святии
новомученицы,/ молитесь утвердиться Ей незыблемей и
непоколебимей до скончания века.

Страданьми и исповеданием Христа, святии сродницы наши,/
вшедше в Небесная селения, яко древле Израиль в землю
обетованную,/ отечество ваше земное, Русь Святую,/ в любви
сохраняйте молитвами вашими.

Богородичен: Небесных кругов вышшая/ и славою Божественною
преукрашенная, Дево Мати Божия,/ спаси души наша.

Кондак новомучеников, глас 3.

Подобен: Дева днесь:

Днесь новомученицы Российстии/ в ризах белых предстоят Агнцу
Божию/ и со Ангелы песнь победную воспевают Богу:/
благословение, и слава, и премудрость,/ и хвала, и честь,/ и сила,
и крепость/ нашему Богу/ во веки веков. Аминь.

Икос:

Красный личе, светозарнии и божественнии светильницы,/ свету
великому предстояще присно, богоблаженнии мученицы,/ и
оттуда испущаемыми не вечерняго Божества сиянии,/ всегда

просвещаемы и обожаемы,/ верую память вашу совершающыя божественную, просветите/ и омрачения, и страстей, и бед, и злобы избавите,/ молящися непрестанно о всех нас.

Седален, глас 2:

Новии страстотерпцы Российстии,/ мученически поприще земное скончавшии и страданьми дерзновение ко Господу приобретшии,/ молитесь Ему, вас укрепльшему,/ да и мы, егда найдет на ны испытания час,/ мужества дар Божий восприимем.

Слава, и ныне, Богородичен, глас 4:

Не премолчим присно, Богородице Дево,/ благодарственно воспевати от сердца Твоя милости, Владычице, раби Твои, вопиюще и глаголюще:/ Пресвятая Дево, предвари и избави нас от враг видимых и невидимых,/ и от нужды и всякаго прещения,/ Ты бо еси наше заступление.

Песнь 4

Ирмос: Провидев пророк/ тайну Твою неизреченную, Христе, провозгласи:/ положил еси твердую любовь крепости, Отче Щедрый,/ Единороднаго бо Сына, Благий,/ очищение в мир послал еси.

Всем концем земли явися чудо смотрения Твоего, Владыко,/ кровию бо новомученик, яко водою, угасил еси в Российской земли пламень нечестия и развращения/ и спасл еси люди Твоя. Славу Божию унаследовасте, новомученицы, просиявшии в Земли нашей,/ отвергшеся бо себе и страх смертный препобедивше,/ любовь к Богу даже до смерти мужественно сохранили есте. Подвигом добрым подвизавшиися, святии новомученицы Российскойстии,/ к покаянию и добродетельному житию подвигните нас,/ да и мы вашими молитвами сподобимся прославляти Господа во Царствии Его.

Богородичен: На Твой надеющеся Покров, Мати Божия,/ со святыми новомученики и исповедники Российскими прославляем милосердие Твое.

Песнь 5

Ирмос: Союзом любве/ связуеми апостоли,/ владычествующему всеми себе Христу возложше,/ красны ноги очищаху,/ благовествующе всем мир.

Дерзновенно, святии, исповедали есте Господа пред отступники и гонители:/ с нами Бог, взывающе, разумеите и покарайтесь,/ страха вашего не убоимся, ниже смутимся, яко с нами Бог.

Уврачуйте молитвами вашими, святии новомученицы Российскойстии,/ люди богоборныя, враждою и убийствы дышущыя,/ и мир стране нашей и верным людям даруйте.

Предстояще Христу, власть имущу судити всему миру,/ святии новомученицы и исповедницы Российскойстии,/ очистите нас от грехов наших молитвами вашими,/ да не с миром осуждени будем.

Богородичен: Водворяет ны змий во юдоль плача и чаяния злых,/ не можем терпети скорби своя, взываху новомученицы,/ Ты же,

Богородительнице, простерла еси им Покров Свой/ и спасла еси от сетей вражиих.

Песнь 6

Ирмос: Бездна последняя грехов обыде мя / и волнения не ктому терпя,/ яко Иона, Владыце, вопию Ти:/ от тли мя возведи.

Волны безбожнаго нечестия тщахуся потопити корабль Церкви Русския,/ Ты же, Истинный Кормчий, спасл еси шествующыя на нем молитвами страстотерпцев Российских, вопиющих:/ Господи Сил, из смертоносныя глубины возведи ны.

Безбожнии внуцы Каиновы святыни церковныя поруганию и огню предаша,/ обители разориша, храмы, яко овощная хранилища, содеяша,/ христоробивыя люди в темницы заключиша и умучиша./ Вы же, страстотерпцы, с любовию учили есте:/ сие бысть по грехом нашим, людие, покайтеся.

Увы нам, увы, вопияху исповедницы Российстии,/ видяще, яко безумнии богоборцы святыни Земли нашея разориша,/ обители, яко узилища темничная, содеяша,/ храмы Божия в скверная и позорищная места обратиша/ и кровь христианскую в них пролияша./ Сего ради опустошишася сердца нечестивых/ и живот их аду приближися.

Богородичен: Изведи нас из рова погибели/ и уврачуй наша греховныя язвы, Пресвятая Мати Дево,/ да неосужденно сподобимся присно прославляти новомученики Сына Твоего и Бога нашего.

Кондак и икос воскресны.

Песнь 7

Ирмос: Отроцы в Вавилоне/ пещнаго пламене не убояшася,/ но посреде пламене ввержени,/ орошаеми пояху:/ благословен еси, Господи Боже отец наших.

Отроцы в Вавилоне древле, яко основание,/ новомученицы же Российстии ныне, яко увенчание,/ с лики страстотерпец присно взывают:/ благословен еси, Господи Боже отец наших.

Отроцы в Вавилоне пещнаго пламене не убояшася,/ новомученицы же Российстии, тем подражающе,/ гонения безбожных в ничтоже вмениша,/ темже ныне согласно с ними воспевают:/ благословен еси, Господи Боже отец наших.

Днесь торжествует Церковь Русская,/ святии бо новомученицы, сродницы наши,/ к ликостоянием святых от века Богу благоугодивших присовокупившеся,/ согласно с ними воспевают хвалебную песнь:/ благословен еси, Боже отец наших.

Богородичен: Предстоящи Ти Кресту Сына Твоего, Богомати,/ оружие пройде душу Твою,/ темже и попечение сугубое о возлюбивших Его прияла еси,/ иже Тя сыновне величают:/ благословенна Ты в женах еси, Всенепорочная Владычице.

Песнь 8

Ирмос: За законы отеческия/ блаженнии в Вавилоне юноши предбедствующе,/ царюющаго оплеваша повеление безумное,/ и, совокуплени, имже не сваришася огнем,/ державствующему

достойную воспеваху песнь:/ Господа пойте, дела,/ и превозносите во вся веки.

Законы Христовы возлюбиша, новомученицы и исповедницы Российстии,/ безбожная же повеления отринуша/ и, ревностию о Бозе связуемии,/ Богу победную песнь воспеваху:/ да благословит Господа Русь Святая и превозносит Его во веки.

Егда земля Российская тьмою безбожия и Каиновым озлоблением объята бысть,/ тогда мнози христоролюбивии людие на горькия работы изгнани быша/ и глад, мраз, зной и смерть лютую мужественне претерпеша,/ верою же, надеждою и любовию совокуплени,/ достойную воспеваху песнь:/ да благословит Господа Русь Святая и превозносит Его во веки.

Ангелов хвалу и новомучеников славословие милостивно приемляй,/ не отрини, Триипостасный Боже, от сонма их и нас, недостойных,/ но сподоби вкупе с ними воспевати:/ да благословит Господа Русь Святая и превозносит Его во веки.

Богородичен: Зрящи поругание святаго удела Своего,/ скорбяше Пречистая Мати и державную помощь верным людям простираше,/ Сына же Своего усердно моляше, взывающи:/ да благословит Господа Русь Святая и превозносит Его во веки.

Песнь 9

Ирмос: Странствия Владычня/ и безсмертныя трапезы на Горнем месте/ высокими умы,/ вернии, приидите, насладимся/ возшедша Слова,/ от Слова научившися,/ Егоже величаем.

Безсмертныя трапезы и жизни вечныя во Царствии Божием/ наслаждаются ныне новомученицы и исповедницы Российстии,/ исполнися бо на них обетование Господне:/ побеждающим дам сести со Мною на Престоле Моем.

Да прославятся с лики новомучеников и исповедников Российских жены богомудрыя земли нашея,/ яже мироносиц восприемшя чин и мужески Христу последовавша,/ страдания за Имя Его претерпеша/ и верно отцем, мужем и братьям нашим, Христа ради мучимым, послужиша./ Сего ради ныне в жизни вечней вкупе с ними/ трапезы безсмертныя наслаждаются.

Жизнодавче Господи,/ молитвами новомучеников и исповедников Российских / упокой со всеми праведными верныя рабы Твоя, за имя Твое пострадавшыя:/ святители и иереи, монахи и мирския,/ старыя, юныя и всяк возраст, именуемая и неименуемая,/ яко истинныя сыны и други Божия.

Богородичен: Яко Взбранная Воевода воинства новомучеников и исповедников Российских,/ державный покров и милостивное заступление явила еси, Пресвятая Дево, Земли нашей,/ опустошаемей скорбными и безбожными наведением./ Сего ради ныне молим Тя:/ прости люди согрешшыя и сохрани Святую Русь. Светилен воскресен. Слава, новомучеников. И ныне, Богородичен воскресен.

Светилен новомучеников:

Яко отребие, миру быша, святии новомученицы и исповедницы

Российстии,/ каменiem побиени быша, претрени быша,
искушени быша, убиством меча умроша,/ свидетельствующе о
Свете Истиннем, Иисусе Христе, Господе нашем.

На хвалитех стихиры воскресны 4, и новомучеников 4, со
славником. Слава, стихира евангельская. И ныне,
Преблагословенна еси:

Стихиры новомучеников, глас 8.

Подобен: О, преславнаго чудесе:

О, преславнаго чудесе!/ В последняя времена возсиявают
мученицы/ и прелести мрак отгоняют,/ вера христианская ныне
возвышается/ и падает нечестие,/ радуются вернии / и праздник
новоявленным составляют,/ вопиюще Христу Богу:/ мучеников
похвала и победа Ты еси, Всесильне.

Творение святителя Афанасия Ковровскаго

Веры бронями,/ и щитом благодати,/ и креста копием
вооружившеся,/ сопротивным силам непобедими бысте/ и, яко
Божественнии храборницы,/ демонская ополчения победивше,/
со ангелы ликуете,/ верныя же заступаєте, и освящаете,/ и
спасаете, призываемии.

О, преславнаго чудесе!/ Чудес светлостьми/ солнца светлейше/
присно святии сродницы наши/ светят концем Русския Земли,/ от
невечернаго Света облистаемы,/ ихже сиянии/ облацы от страны
нашей отгоняются варварстии/ и демони побеждаются.

Слава, глас 6:

Новоявленные звезды днесь/ на церковней показашася тверди,/
во мнозех местех бывшии мученицы Христовы,/ ихже
ублажающе, мучениколюбцы,/ по долгу им прирцем, глаголюще:/
радуйтесь, благочестия утверждение и нечестия обуздание;/
радуйтесь, Российския Церкви славо и безбожных посрамление;/
радуйтесь, образи терпения и за Христа страдания./ Станите,
непобедимии, посреде нас умне,/ от бед и искушений
избавляюще,/ и молитесь о спасении душ наших.

И ныне, Богородичен.

На Литургии

Блаженна гласа на 6, и от канона новомучеников, песнь 3-я, на 4.
Прокимен воскресен гласа, Апостол, Евангелие и Причастен
воскresен гласа. И новомучеников прокимен, глас 7: Бог нам
Прибежище и Сила. Стих: Помощник в скорбех, обретших ны
зело. Апостол дне, и новомучеников, к Римляном, зачало 99 (гл. 8,
31-39). Аллилуриарий воскресен гласа, и новомучеников, глас 4:
Воззваша праведнии, и Господь услыша их, и от всех скорбей их
избави их. Стих: Многи скорби праведным, и от всех их избавит я
Господь. Евангелие дне, и новомучеников, Луки зачало 105-106.
Конец: В терпении вашем стяжите душа ваша (гл. 21, 8-19).

Причастен воскресен, и новомучеников: Радуйтесь, праведнии, о
Господе, правым подобает похвала.

Молитва

О, святии новомученицы и исповедницы Российстии: святителие

и пастырие Церкви Христовы, царственнии страстотерпцы, благовернии князие и княгини, доблии воины, монаси и мирстии, благочестивии мужие и жены, во всяцем возрасте и сословии за Христа пострадавшии, верность Ему даже до смерти свидетельствовавшии и венец жизни от Него приемшии! Вы во дни гонения лютаго, землю нашу от безбожных постигшаго, на судищах, в заточениих и пропастьех земных, в горьких работах и всяких скорбных обстояниих образ терпения и непостыднаго упования мужественне явили есте. Ныне же, в раи сладости наслаждающесе, пред Престолом Божиим во славе предстоите и присно хвалу и ходатайство со Ангелы и всеми святыми Триединому Богу возносите.

Сего ради мы, недостойнии, молим вас, святии сродницы наши: не забудьте земнаго отечества вашего, грехом Каинова братоубийства, поруганием святынь, безбожием и нашими беззаконии отягченнаго. Умолите Господа Сил, да утвердит Церковь Свою непоколебиму в мире сем многмятежем и лукавом; да возродит в Земли нашей дух братолюбия и мира; да паки будем мы царское священство, род Божий, избранный и святой, присно с вами славящий Отца и Сына и Святаго Духа во веки веков. Аминь.

Аще Неделя мытарева или блуднаго.

На велицей вечерни на Господи, воззвах: стихиры воскресны 3, и Триоди 3, и новомучеников 4. Слава, Триоди: И ныне, Богородичен 1-й гласа. На литии стихира храма, таже Триоди хвалитны. Слава, новомучеников: И ныне, Триоди. На стиховне стихиры воскресны. Слава, новомучеников: И ныне, Триоди (зри Славник на стиховне вечера). На благословении хлебоб, Богородице Дево: дважды, и новомучеников, единожды. На утрени на Бог Господь: тропарь воскресен, дважды. Слава, новомучеников: И ныне, Богородичен воскресен. По кафисмах седальны воскресны с Богородичны их. По полиелеи два седальна новомучеников, глас 4. Слава, полиелейный седален новомучеников, глас 6: И ныне, Богородичен, глас 8. Канон воскресен со ирмосом на 4, и Богородицы на 2, и Триоди на 4, и новомучеников на 4. Катавасиа по уставу. По 3-й песни кондак, икос и седален новомучеников. И ныне, Триоди. По 6-й песни кондак и икос Триоди. Светилен воскресен. Слава, новомучеников: И ныне, Триоди. На хвалитех стихиры воскресны 4, и новомучеников со славным 4, с припевы их. Слава, Триоди: И ныне, Препоблагословенна еси:

На литургии блаженна гласа на 4, и Триоди, песнь 3-я, на 4, и новомучеников, песнь 6-я, на 4. Прокимен, Апостол, аллилуиа, Евангелие и причастен дне и новомучеников.

Аще Неделя мясопустная.

На велицей вечерни на Господи, воззвах: стихиры воскресны 3, и триоди 4, и новомучеников 3.

На утрени канон воскресен со ирмосом на 4, и Триоди на 6, и

новомучеников на 4. На хвалитех по стихирах новомучеников
поем стихиру Триоди: Предочистим себе: с припевом ея.

